

AENEIDOS I

munera laetitiamque dii.  
 at domus interior regali splendida luxu  
 instruitur, mediisque parant conuiuia tectis:  
 arte laboratae uestes ostroque superbo,  
 ingens argentum mensis, caelataque in auro 640  
 fortia facta patrum, series longissima rerum  
 per tot ducta uiros antiqua ab origine gentis.

Aeneas (neque enim patrius consistere mentem  
 passus amor) rapidum ad nauis praemittit Achaten,  
 Ascanio ferat haec ipsumque ad moenia ducat; 645  
 omnis in Ascanio cari stat cura parentis.  
 munera praeterea Iliacis erepta ruinis  
 ferre iubet, pallam signis auroque rigentem  
 et circumtextum croceo uelamen acantho,  
 ornatus Argiuae Helenae, quos illa Mycenis, 650  
 Pergama cum peteret inconcessosque hymenaeos,  
 extulerat, matris Ledaе mirabile donum;  
 praeterea sceptrum, Ilione quod gesserat olim,  
 maxima natarum Priami, colloque monile  
 bacatum, et duplicem gemmis auroque coronam. 655  
 haec celerans iter ad nauis tendebat Achates.

At Cytherea nouas artis, noua pectore uersat  
 consilia, ut faciem mutatus et ora Cupido  
 pro dulci Ascanio ueniat, donisque furentem 660  
 incendat reginam atque ossibus implicet ignem.  
 quippe domum timet ambiguum Tyriosque bilinguis;  
 urit atrox Iuno et sub noctem cura recursat.  
 ergo his aligerum dictis adfatur Amorem:  
 'nate, meae uires, mea magna potentia, solus  
 nate patris summi qui tela Typhoëa temnis, 665  
 ad te confugio et supplex tua numina posco.  
 frater ut Aeneas pelago tuus omnia circum